

Pilersaarusiorneq aamma nunaminertat atorineqartarnerat pillugit Inatsisartut inatsisaat nr. 17, 17. november 2010-meersoq nutaamik eqaannerusumillu iluseqalersinnaaqullugu apeqquteqaat aallaavigalugu oqallisissiaq.

(Inatsisartunut ilaasortaq, Aqqalu C. Jerimiassen, Atassut)

Akissuteqaat

(Aningaasaqarnermut Akileraartarnermullu Naalakkersuisoq)

Apeqquteqaat aallaavigalugu oqallisissiamut qujanaq.

Innuttaasut illumik piginnittunngornissaannik ajornannginnerulersitsisumik aammalu illuliornermik ineriartortitsinermillu siuarsaasussamik, pilersaarusiornermut inatsisip eqaannerusumik nutaaliaanerusumillu iluseqalernissaa siunnersuuteqartup kissaatigaa. Naalakkersuisut innuttaasut piginnittunngornissamut namminerlu inissaqarnissamut periarfissaannut inatsisit tunngavissiiinissaat pillugu kissaateqarneq isumaqatigaat. Naalakkersuisooqatigiinnissamut isumaqatigiisummi, sinaakktissat eqaatsut ullutsinnullu naleqquttut, nunarput tamakkerlugu inuussutissarsiornermut, nunassittarnermut ineqarnermilu ineriartortitsinermik nukittorsaasussat, aamma ukkatarineqarput.

Tassani aamma pilersaarusiornermut nunaminertanullu suliassaqarfik pineqarpoq. Tassani piffissaagallartillugu tamakkiisunullu isiginnittumik pilersaarusiornikkut, peqatigisaanik mianerisassat pisariaqartut sillimaffigalugit, ineriartortitsinissap qulakkeernissaa siunnerfigineqarpoq.

Pilersaarusiornermut inatsit inatsisaavoq, inuiaqatigiinni tamakkiisunut nalilersuineq aallaavigalugu nunaminertanik atuinissamut pingaarnertigut killissaliussanik aalajangersaavusoq. Tassani inuussutissarsiornernup, attaveqaasersuutit najugaqarfiillu ineriartortinnissaat kiisalu pinngortitamik, kulturimik, avatangiisinik isumannaallisaanermillu illersuinissaq, ajornarunnaarsinneqarput.

Nunatsinni maani nunaminertat annertoorujussuugaluartut, nunap sannaq, pinngortitaq imaluunniit isumannaallisaanermut tunngasut pissutigalugit sumiiffippassuit illuliorfigineqarnissamut piukkunnangillat. Nunaminertanik nutaanik ilanngutsitsinissaq akisoorujussuusinnaavoq. Taamaattumik nunaminertanik sanaartorfissagissarneqareertunik, pingaartumik sumiiffinni siuariartorfiusuni, ujartuineq amerlanertigut annertoorujussuusarpoq.

Illumik piginnittut nammineq illuminnik eqqaanilu allanngortiterinissaat ajornannginnerussasoq, oqallinnissamut saqqummiussami aamma allassimavoq. Nunaminertamik atuinissap allanngortinneqarnissaanut aallaaviatigut nutaamik nunaminertamik atugassiisoqartussaasarpoq. Tamatuma saniatigut akuersissummik

peqarnissaq piumasaqaataanersoq, kommunimut pilersaarutip sukumiisortai apeqqutaasarput. Assersuutigalugu taakkua tassaasinnaapput illup qaavata uinganera, saqqai, qalipaatai aammalu illuliorfigineqartup annertussusissaa pillugit aalajangersakkat.

Taamaalilluni maleruagassat qanoq sukumiitigissanersut kommunalbestyrelsit aalajangertussaavaat. Inatsit atituumik atugassiivoq, aammalu pilersaarusiorneq najukkami oqartussaaqatigiinnermut najukkanilu pingaarnersiuinissanut annertuumik takussutissaalluni.

Naalakkersuisut oqimaaqatigiimmik aallaaveqarnissaq pingaartippaat: killissaliussat eqaatsut ullutsinnullu naleqquttut, ineqarnermi inuussutissarsiornermilu ineriartortitsinissamut tunngavissiisussat, kisianni peqatigisaanik akisussaassusilimmik pilersaarusiukkamillu nunaminertanik atuinissaq qulakkeerneqassalluni.

Qujanaq.